

# Jon 1

## leta pakanama ya girumina

### *Yawasana riunama*

<sup>1</sup> Boni pakane yaba ya kenakenana inam yawasana riunama. Inam riunama vutuna tauma apasol beamaie kè vaiena, matamaie kè kita da kè kita yağe be nimamaie kè taikonia. <sup>2</sup> Inam vutuna yawasana, be yawasaninama tauma ġaromiae ya mağatara be matamaie kè kitakitana, vutuna yodi kawai matemate be yawasana kenakena nonoġinama ġaromie ka rarauguguyena. Inam yawasaninama noġone Tamadama Mamaitua ġarone kenakenanama, vutuna yodi ġarode ya mağatarana. <sup>3</sup> Be tauma aba matamaie kè kitakita be beamaie kè vaivaiena, vutuna yodi ġaromie ka rarauguguyena da taumi mate sibo tèi rawateġeidana Tamadama be Natunama Yesu Keriso ġarodie.

<sup>4</sup> Uma kauidima ka girugirumidina ġaromie da matabuda tài nuavere tenaġħana aubainama.

### *Yanae tà naġona*

<sup>5</sup> Be tauma Mamaitua ġarone vari kè paġo be ġaromie ka rarauguguyena inam umanama: Mamaitua tauna yana, be tauna nopone nam kupi ima kenakenana, ibewa. <sup>6</sup> Be tauda kupi yawasanidima tà voivoiedina, be yaġoro tà riuriuna da tauda Mamaitua mate tèi rawateġeidana, tauda inam banaga kaikaiyovudama, be nam riukaua ruvane tama naġonaġona. <sup>7</sup> Be deġoda

yanae tà naḡona, maika tauna yanae e miamiana nama, inam raḡanine tauda tokare dà banabanagama mate tài rawateḡeida be tauna natunama Yesu kosinine dà gewagewama matabudi e koḡa poredina.

<sup>8</sup> Be deḡoda tà riuna tauda nam gewagewa ḡarode, tauda inam tāwai kedadoka waigewadana, be riukaua nopode nam ima kenakenana. <sup>9</sup> Be Mamaitua inam banaga waipatutuna be didimaninama, aubainama tauna tokare dà gewagewama matabudi e noḡota poredi be dà yawasanama barebaredima mate e koḡa poredina, deḡoda dà gewagewama tà kuvesidina. <sup>10</sup> Baninama Mamaitua ya riuna da banaga matabuda gewagewa banegidama. Be deḡoda tà riuna tauda nam gewagewa te voia rubuna, tauda inam Mamaitua tà riuriu waikaikaiyovuna, be tauna na riuma tauda nopode nam ima kennakenana.

## 2

<sup>1</sup> Yau sedama,\* taugu uma kauidima yà riuriuemina da taumi nam gewagewa ko voiedi. Be deḡoda gewagewa ko voienna, naumeki da banaga tenaḡa tauda dà tausaguma e miamiana. Tauna vutuna tauda muride e midi be aubaidama Tamadama ḡarone e giugiuna. Tauna vutuna Yesu Keriso, didimana baneginama. <sup>2</sup> Tauna vutuna ya rauepaiyeda be dà gewagewama aubainama tubuḡine ya tipana aubaidama, be nam taudaḡa, ibewa da dobu

---

\* **2:1:** Riu ‘yau sedama’ inam nam na seda ḡoma. Be ibewa da tauna banaga poranama aubainama nama e riuriuna.

matabuna adi gewagewama mate aubainama, yodibe Mamaitua nuanama ya subana.

<sup>3</sup> Be deḡoda Bada na riuvavasaḡama matabudi tà voteyeteyedina, inam tawai maḡatara mu-naḡedana da tauda inam tauna ġaroġaronama. <sup>4</sup> Be deḡoda tam aitau kwa riuna, “Taugu Mamaitua ġaronama” be na riuvavasaḡama nam kwa voteyeteyedidi, tam inam banaga kaikaiyovumma be nam riukaua ruvane kuma miamiana. <sup>5</sup> Be deḡoda aitau Mamaitua na giuma e vovo teyeteyedina, tauna inam Mamaitua na wainuapaḡoma noponama ya moḡavuna. Be nema tā katai bake da tauda Mamaitua nopone tà miamia? <sup>6</sup> Aitau e riuriuna da tauna Bada ġaronama, naumeiki da Yesu nema ya naḡonāgo bakona, nama tauna e naḡona.

### *Riuvavasaḡa vaunama*

<sup>7</sup> Yau banaga kauama, Bada Yesu ya riu vavasaḡedana da tauda dà banagama dà banagama sibo tèi nuapaḡoedina. Be inam riuvavasaḡinama nam riu vauna, ibewa da giunama teneḡinama taumi noḡone koya vaivaiena, vutuna yodi yà girugirumina. <sup>8</sup> Inam riuvavasaḡinama inam riu poranama, be you riu vaunama. Be inam riuvavasaḡinama inam riukaua, vutuna Keriso na yawasanae be taumi ami yawasanae ya maḡatarana, baninama tadiwanawana ya vaikoakoa be riukaua yananama yodi nopomie e yanayanana.

<sup>9</sup> Aitau e riuriuna da tauna yanae e miamiana, be deḡoda turanama ġesau e gadogadoḡaiena, tauna inam tadiwanawana

noponaǵa e naǵonaǵona. **10** Be aitau turanama ǵesau ewai nuapaǵoena, tauna inam yanae e naǵonaǵona. Be inam baneginama ǵarone nam aba gewagewanama ima kenakenana da tokare turanama ǵesau ei beku. **11** Be aitau turanama ǵesau e gadogadoǵaiena, tauna inam tadiwanawana noponaǵa e naǵonaǵo be e miamiana, baninama tauna matanama tadiwanawana ya suma tom be deǵo e naǵonaǵona nam i kataiena.

**12** Yau sedama, taugu uma kauidima yà girugirumidina ǵaromie, be ko kataie da Mamaitua ami gewagewama ya noǵota poredina, baninama Keriso tauda aubaidama ya mariyawa be ya gurina.

**13** Taumi dosi tautaugomimima, taugu uma kauidima yà girugirumidina ǵaromie, baninama taumi Bada kaite koya kataiena, tauna vutuna boni pakane da yodi nama e miamiana.

Be taumi yarayaraga waisumeǵimima, taugu uma kauidima yà girugirumidina ǵaromie, baninama taumi Seitan koya vaisubana. Be taumi seda matabumi, taugu uma kauidima yà girugirumidina ǵaromie, baninama taumi kaite Tamadama Mamaitua koya kataiena.

**14** Be mate dosi tautaugomimima, taugu uma kauidima yà girugirumidina ǵaromie, baninama taumi Bada kaite koya kataiena, tauna vutuna boni pakane da yodi nama e miamiana.

Be taumi yarayaraga waisumeǵimima, taugu uma kauidima yà girugirumidina ǵaromie, baninama taumi koyai rewapanana, be Mamaitua riunama nopomie e kenakenana na

rewapanae taumi Seitan koya vaisubana.

*Uma dobunama nam koi nuapaḡoe*

<sup>15</sup> Uma dobunama be yaba matabudi nopone ta kenakenana nam koi nuapaḡoedi. Be deḡoda aitau uma dobunama ewai nuapaḡoena, tauna inam Tamadama Mamaitua wainuapaḡoenama nopone nam ima kenakenana. <sup>16</sup> Baninama yaba matabuna uma dobune tà kitedi be nuadama ta sorusorudina kitedima maika tubuḡidama adi ḡoanama, bo mata na ḡoanama, bo banaga adi waiguyauma. Inam yabedima matabudi nam Tamadama marae ḡarone be ti yovona, ibewa da taudi matabudi dobu ḡaronama. <sup>17</sup> Uma dobunama be na ḡoanama matabudi tokare ta samoana, be aitau Mamaitua na ḡoanama e voivoiena, inam baneginama tokare e mia nonoḡana.

*Keriso tauwai ḡavienama*

<sup>18</sup> Yau sedama, yodi inam raḡan damodie ta tavatavana. Be boni taumi koya vaie da Keriso tauwai ḡavienama e veraverauna e tavana. Be Keriso tauwai ḡavienama ḡesaudima toitoi kaiteka ta tavatavana. Inam kauidima tauda tawai kataidana da kaiteka raḡan damonama e tavatavana. <sup>19</sup> Inam banegidima noḡone tauda mate tèwai taparoro tenaḡana, be yodi a gosedana. Inam banegidima nam tauda dà banaga kaua, be deḡoda taudi sibo tauda dà banagama, taudi tokare nam a goseda. Tauda noḡone taudi mate tè miamiana, be taudi a gosedana aubainama yodi tè kataie da inam banegidima taudi nam tauwai sumaḡa damnama nopone tima miamiana. Be

deḡoda ti ḡoena, tokare nam a goseda. <sup>20</sup> Be taumi inam ibewa, baninama Banaga Babau-nama kaite matabumi yai aiainimi, be riukaua koya kataienā. <sup>21</sup> Taugu ḡaromie yà girugiru-mana, nam ko noḡoti da taumi kabe riukaua nam ko katakataie, ibewa da taumi riukaua koya kataienā aubainama ḡaromie yà girugiru-mana. Be inam riukauinama nopone nam tokare kaiyovu tà banavi, ibewa. <sup>22</sup> Be yodi aitau kaikaiyovuna? Banaga aitau e riuriuna da Yesu tauna nam Tauwai yawasana, inam baneginama tauna vutuna banaga kaikaiyovunama, tauna vutuna Keriso tauwai ḡavienama, baninama tauna Tamadama be Natunama Yesu taubovied-imā. <sup>23</sup> Deḡoda aitau Mamaitua Natunama e bovibovienā, tauna nam tokare Tamanama e paḡo be mate ta mia tenaḡa. Be aitau Ma-maitua Natunama ewai anine be e riuriuna da Yesu tauna Tauwai yawasana, inam baneginama tauna tokare Tamadama Mamaitua e paḡo be mate ta mia tenaḡana.

<sup>24</sup> Ko kita kaua da aba noḡone ai kataimi be koya vaivaiena, naumeki da nopomie e kena nonoḡana. Deḡoda nopomie e kenana, taumi tokare natunama Yesu be Tamanama Mamaitua mate ko mia tenaḡana <sup>25</sup> be yawasana kenakena nonoḡinama ko paḡona, inam vutuna tauna ya saugedana.

<sup>26</sup> Taugu uma yabedima yà girugirumidina ḡaromie da yà riu wainoḡotimina, baninama banaga ḡesaudima ta ḡoeḡoena da taumi tai doka waigewemina. <sup>27</sup> Be taumi Arua Babau kaite koya paḡo be nopomie e miamiana. Vu-

tuna aubainama yodi nam tauwai katakatai ġesau koma ġoēgoena da sibo yai katakataimia. Baninama Arua Babau yaba matabudi ewai katakataimina, be aba tauna ewai katakataimina inam matabudi riukaua, be nam kaiyovu. Be Arua Babau aba yawai katakataimina, nama ruvane sibo raġan matabuna Keriso ġarone koya miana.

<sup>28</sup> Vutuna aubainama yau sedama, ko kaigurate da Yesu na yawasanae ko mia nonoġana. Be tauna e maġatarana raġanine, tauda tokare ma raudebatorada tauna noġone tà midina, be nam tà tunimayaġa. <sup>29</sup> Taumi koya kataienia da tauna didimana baneginama, be mate aitauġa didimana ta voivoiedina, inam tauna na sedama.

### 3

#### *Mamaitua na sedama*

<sup>1</sup> Yodi ko kita da Mamaitua na wainuapaġoma ya moraba kauana ġorode, vutuna aubainama ya voieda da yodi na sedama tè tubuġana. Riukaua da na seda ġomoma tauda! Be aba aubainama dobu banegidima tauda nam ti kataieda, inam baninama taudi Mamaitua nam ti kataienia. <sup>2</sup> Yau banaga kauama, tauda yodi Mamaitua na sedama tè miamiana, be nema tokare tè tubuġa bakona, yodi tauda nam te katai kauena. Be aba tè kataienia inam Bada e maġatarana raġanine tauda tokare tauna maika tè tubuġana, baninama inam raġanine tauna tokare bani ġominama matade tè kitana. <sup>3</sup> Be aitau da Kerisoe inam noġotinama ġarone e kenakenana, tauna yawasana miremiredima nam ima voivoiedina,

baninama Keriso mate tauna nam yawasana miremiredima i voiedina.

<sup>4</sup> Aitaūga gewagewa ta voivoiedina, taudi tarawatu tawai mia kotova kauena. Baninama gewagewa inam tarawatu tauvagudagudanama.

<sup>5</sup> Be taumi koya kataiena da Yesu ya mağatarana gewagewa noğota porenama aubainama. Be tauna nopone nam gewagewa ima kenakenana.

<sup>6</sup> Be aitau tauna ġarone e miamiana, tauna nam gewagewa ima voivoiedina. Be aitaūga gewagewa tawai boruditidina, taudi Yesu nam ti kitana, bo nam ti kataiena.

<sup>7</sup> Yau sedama, ko kita kaua da nam aitau e boru waideğemi. Aitau da didimana e voivoiena, naumeki da tauna banaga didimaninama, Yesu didimaninama e miamiana maika. <sup>8</sup> Be aitau gewagewa e voivoiena, tauna inam Diaboro ġaronama, baninama Diaboro tauna boni pakane nama gewagewa ya voivoiena. Inam vutuna aubainama Mamaitua Natunama ya yovo be ya mağatarana da Diaboro na noyama e kawa gewegewedina. <sup>9</sup> Aitau Mamaitua ġarone ya tubuġa vitarana, tauna tokare nam gewagewa ei borudidi be kwa kita. Baninama tauna nopone Mamaitua yawasana ya boruna maika pesi. Tauna nam teneteneġina da gewagewa e voiedi, baninama tauna Mamaitua ġarone kaite ya tubuġa vitarana. <sup>10</sup> Tokare nema tà katai bake da değō taudi Mamaitua na seda, be değō taudi Diaboro na seda? Umanama tokare tà kataiena: Aitau da nam turanama imawai nuapaġoena, be nam yawasana didimanidima ima voivoiedina, tauna inam nam Mamaitua Natuna.

*Turamma turamma nuamma e pa o*

<sup>11</sup> Uma varinama vutuna no one t  vaivaiena yodi y  riuemina, tauda sibo turadama turadama nuadama ya pa ona. <sup>12</sup> Be nam sibo Kein na yawasanama t  pa o. Tauna Diaboro  aronama be tasinama yai gurina. Be aba sabine tasinama yai guri? Baninama Kein inam voia gewegewedima ya voivoiedina, be tasinama tauna voia didimanidima ya voivoiedina, aubainama tasinama yai gurina. <sup>13</sup> Yau banaga kauama, de oda dobu banegidima ta tua aiemina, nam ko nuababa a.

<sup>14</sup> Tauda turadama turadama nuadama e pa op ona, be inam kedane tauda t  kataiena da guri inam muride t  gose pore be yodi yawasana t  pa ona. Be aitau da nam imawai nuapa ona, tauna inam gurinama e miamiana. <sup>15</sup> Be aitau da turanama e tuatu aiena, tauna inam tauvunu a e miamiana. Be taumi koya kataiena da tauvunu u a nopone yawasana kenakena nono inama nam ima kenakena rubuna. <sup>16</sup> Tauda yodi tokare Kerisoe wainuapa o t  kita be t  kataiena, baninama Yesu tauda aubaidama ya mariyawa be ya gurina. Be tauda mate sibo d  yawasanama muride t  boru be d  banagama sibo t  sagudina, de oda guri t  banavi bo ibewa, inam matabuna naumeki. <sup>17</sup> De oda aitau  orone taragai be turanama  esau ya kita da taragai e marumarauabieno, be tauna nam i raunuatoie be i saguna, be tauna e riuriuna da Mamaitua ewai nuapa oena, inam nemanama?

<sup>18</sup> Yau sedama, nam mududa a wainuapa o e riuriue, ibewa da voienama mate. Inam vutuna wainuapa o riuriukauinama. <sup>19</sup> Inam kedane t 

kataie da tauda riukaua ġaroġaronama, be tokare Mamaitua noġone nuadama torane tà midina, <sup>20</sup> avedi da nōpode tà noġota bekubekuna, be inam nam tà noġoti. Mamaitua yaba matabudi ya kataiedina, vutuna aubainama tauna inam noġota bekubekudima nam ima siesievidina, be tauna wainuapaġo banidima tà voiedina, vutuna e siesievidina.

<sup>21</sup> Yau banaga kauama, nōpoda na e vobekubeku, be nuadama torane Mamaitua noġone tà midina, <sup>22</sup> be ġarone aba tài baġena, tauna tokare e utedana, baninama tauda na riuvavasaġama tà vovo teyeteyedi be yaba matabuna tà voivoiedina, inam raġanine tauna nuanama tà taiverena. <sup>23</sup> Be Mamaitua na riuvavasaġama inam umanama: Tauna Natunama Yesu Keriso tài sumāġe, be turadama turadama nuadama e paġona tauna ya riuriu vavasaġedana nama. <sup>24</sup> Taudi aitaugħa na riuvavasaġama ta vovo teyeteyena, taudi vutudi Keriso nōpone ta miamiana, be Keriso taudi nōpodie e miamiana. Tauna Aruinama ya utedana, aubainama tè katai kauena da Keriso tauda nōpode e miamiana.

## 4

### *Arua ko kita kauedina*

<sup>1</sup> Yau banaga kauama, banaga ġesaudima ta riuriuna da taudi arua a paġo be ta giugiuna, inam banegidima nam koi sumāġedi, ibewa da noġone ko kita kauedina, deġoda taudi arua Mamaitua ġarone a paġo bo ibewa. Baninama peroveta kaikaiyovudima toitoi dobue ta naġonāġo

bababarana. <sup>2</sup> Be aitau da Mamaitua Aruinama ġarone, tauna tokare umanama ko kita be ko kataienā: Tauna aitau e riuriuna da Yesu Keriso tauna Mamaitua ġarone be ya yovo da yai rawabanaga ġomana, inam baneginama tauna Mamaitua Aruinama ġarone. <sup>3</sup> Be aitau deġoda Yesu nam ei maġatari, inam baneginama tauna arua nam Mamaitua ġarone i paġona, ibewa, tauna inam Keriso tauwai ġavienama aruinama ya paġona. Nogone koya vaiena da Keriso tauwai ġavienama tokare e veraverauna e tavana. Tauna vutuna yodi dobue e naġonāġo bababarana.

<sup>4</sup> Be yau sedama, taumi Mamaitua ġaroġaronama, aubainama uma banegidima koya vaisubedina, baninama Arua nopomie e miamiana, tauna yai rewapanā kauana, nam arua dobue e miamiana maika. <sup>5</sup> Taudi inam dobu ġaroġaronama aubainama, dobuġa kauidima ta giuedi be ta naġonāġona. Be dobu banegidima inam perovetedima kaikaiyovudima ta vaiedi be tawai muriwatanedina. <sup>6</sup> Be tauda inam Mamaitua ġaroġaronama, be aitaugħa Mamaitua na seda ġomama, taudi dà giuma ta vaiedi be tawai muriwatanedina. Be aitaugħa Mamaitua nam na seda, taudi dà giuma nam tima vaiedi be tima voivoiedina. Inam kauidie tauda tokare tà katai kaue da deġo tauna arua riuriukauina, be deġo tauna arua kaikaiyovuna.

### *Mamaitua tauna vutuna wainuapaġo*

<sup>7</sup> Yau banaga kauama, tauda turadama turadama nuadama e paġona, baninama wainuapaġo inam Mamaitua ġarone be ya yovona. Be aitaugħa tawai nuapaġona, taudi inam Mamaitua

garone a tubuġa vitara be Mamaitua a katai kauena. <sup>8</sup> Mamaitua tauna wainuapaġo. Vutuna aubainama aitau da nam imawai nuapaġona, tauna inam Mamaitua nam i kataienia.

<sup>9</sup> Mamaitua na wainuapaġoma ġarode umanama yai maġatarina, tauna nuanuanama natunama tenaġa ġominama ya riupore yovoġena dobue, da yodi taune tauda yawasana ġarone tà paġo be tà miana. <sup>10</sup> Be Mamaitua na wainuapaġoma inam umanama: Nam tauda tei nuapaġo dokena, ibewa da tauna tauda yai nuapaġo dokeda be natunama ya riupore da aubaidama ya rauepaiyada be tubuġine ya tipedana dà gewagewa sabine, yodibe Mamaitua nuanama ya subana.

<sup>11</sup> Yau banaga kauama, Mamaitua kaite yai nuapaġoedana, aubainama tauda mate dà bana-banagama sibo tèi nuapaġoedina. <sup>12</sup> Nam aitau deġo mata ġomine Mamaitua i kita rubuna, be deġoda tauda turadama turadama nuadama e paġona, tauda inam Mamaitua nopode e mi-amiana. Be tauna na wainuapaġoma nopode ya moġavuna, be yodi inam wainuapaġonama parata boruborune ya tavana.

<sup>13</sup> Tauna aruinama tauda ya utedana. Vutuna aubainama tè kataie da Mamaitua tauda nopode e mi-amiana, be tauda tauna nopone tà mi-amiana.

<sup>14</sup> Tamadama Mamaitua Natunama ya riupore yovoġena dobue da tauna dobu matabuna tauwai yawasaninama. Be tauna vutuna tauma kè kita be kawai matamatana. <sup>15</sup> Deġoda banaga aitau e riuriuna da Yesu tauna riukaua Mamaitua Natunama, inam baneginama nopone Mamaitua

e miamiana, be tauna Mamaitua nopone. <sup>16</sup> Be tauda tè kataie be tawai sumagenā da Mamaitua ewai nuapañoedana.

Mamaitua tauna vutuna wainuapaño, be aitau wainuapañoe e miamiana, inam baneginama tauna Mamaitua nopone e miamiana, be Mamaitua inam baneginama nopone. <sup>17</sup> Inam kedane wainuapaño nopode e moraba be parata boruborune e tavana, inam rağanine tauda tokare etara rağanine nuadama torane tā midina be nam tā naira, baninama uma dobue tauda dà yawasanama Keriso na yawasanama maika.

<sup>18</sup> Be wainuapaño banegidima taudi nam ma nairidi tima miamiana. Baninama rağanine wainuapaño e moraba be parata boruborune e tavana, naira tokare e tauriena, be aitau ma nairina e miamiana, inam baninama tauna kovoña e nainairena. Vutuna aubainama degoda naira nama tā kitana, inam wainuapañoñama nam i moraba be parata boruborune i tavana, ibewa. <sup>19</sup> Tauda tawai nuapañoña, baninama Mamaitua noğone yai nuapaño dokedana aubainama.

<sup>20</sup> Değoda aitau e riuriuna, “Taugu Mamaitua yàwai nuapañoena.” Be nuanama nopone turanama e gadogadoğaiena, tauna inam banaga kaikaiyovunama. Uma kwa noğoti: Turamma matame kwa kitakitana be nam kumawai nuapañoena, nema tokare Mamaitua kwai nuapaño bake? Baninama Mamaitua tam nam ku kita rubuna. <sup>21</sup> Be tauna umanama ya riu vavasağedana: Aitau da Mamaitua ewai nuapañoena, naumeki da dobue turanama mate ei nuapañoena.

## 5

*Waisumäge dobu yawasanidima tà vaisubedina*

<sup>1</sup> Aitaugā tawai sumağana da Yesu tauna Tauwai yawasana, taudi inam Mamaitua natunama. Be aitaugā Tamadama tawai nuapañoena, naumeiki da natunama mate tài nuapañoena. <sup>2</sup> Değoda tauda Mamaitua tài nuapañoen be na riuma tà voteyeteyedina, inam rağanine tokare banaga ta kita be ta kataie da tauda Mamaitua na sedama mate tàwai nuapañoedina. <sup>3</sup> Mamaitua wainuapañoenama inam umanama: Tauna na riuvavasağama tà vovo teyeteyedina. Be inam riuvavasağıdima ġarode nam ti piripirina, <sup>4</sup> baninama aitaugā Mamaitua ġarone a tubuğā vitarana, taudi inam dobu yawasanidima a vaisubedina, baninama adi waisumäge debane. <sup>5</sup> Aitau tokare dobu yawasanidima e vaisubedi? Tauna aitau ewai sumağana da Yesu tauna Mamaitua Natuğominama, tauna tokare dobu yawasanidima e vaisubedina.

<sup>6</sup> Yesu Tauwai yawasana tauna ya yovona tauda ġarode. Be Arua Babau ġarode yai mağatarana da Yesu tauna riukaua Mamaitua Natuğominama, baninama tauna upae ya babataito be korosie kosininama ya darorona. Be yodi nam upa taunağā tà noğoti, ibewa da kosina mate tà kita be tà kataie da Yesu tauña riukaua da Mamaitua Natuğominama ya gurina. Be inam kauidima Arua ewai mağataridina tauda ġarode. Be Arua aba ewai matematena, nam aitau e riuwai kaikaiyovu, baninama Arua tauna naumeiki da riukaua. <sup>7-8</sup> Yodi tà kita da uma yabedima

rabuiteğā; inam Arua, upa be kosina tawai matamatana da inam riukaua. Be taudi rabuiteğā ai anina tenağā da inam riukaua. <sup>9</sup> Be banaga ġoma adi kauama ta giugiuuedina tauda tawai aninedina, be you, Mamaitua aba ġarode ya giugiuuedina inam a moraba guratana. Vutuna aubainama Mamaitua natunama varinama yawai matematena sibo tè pa gó be tèi sumágena. <sup>10</sup> Aitauğā Mamaitua Natunama tawai sumágena, taudi nopolie Mamaitua riunama e kenakenana. Be aitauğā nam timawai sumágena, taudi Mamaitua ta riuriu waikaikaiyovuna, baninama tauna Natunama varinama yawai matematena taudi nam ti pa gó be ti sumágena.

<sup>11</sup> Be aba Mamaitua e giugiuena inam umanama: Tauna yawasana kenakena nonoġinama ya utedana. Be inam yawasaninama tokare natunama Yesu ġarone tà banavina. <sup>12</sup> Aitau Mamaitua Natunama Yesu ya pa gó be ġarone e miamiana, tauna inam yawasana ya banavina. Be aitau Mamaitua Natunama nam i pa góna, tauna yawasana nam i pa góna.

### *Jon na giuma damodamodima ya sivudina*

<sup>13</sup> Taumi aitauğā Mamaitua Natunama isanama kowai sumágena, ġaromie uma letanama yà girugirumina da sibo koya kataie da taumi kaite yawasana kenakena nonoġinama koya pa góna. <sup>14</sup> Be değoda tauda na noğotama ruvane tài ba góna, tauda tè katai kauena da tauna tokare bonadama e pa góna. <sup>15</sup> Be tauna bonadama e pa gópa góna, naumeki da aba ġarone tèwai ba góna inam kaite tè pa góna.

**16** Deġoda ai turamma kuya kita be gewagewa e voivoiena, be nuanama e vitarena, naumeki inam gewagewanama nam guri kedanama ima watawatanina, naumeki da tauna aubainama kwa moiragai be Mamaitua ei yawasanina. Be deġoda ai turamma gewagewama e voivoiena be nuanama nam e vitare, inam gewagewanama guri kedanama e watawatanina, inam tauna aubainama nam kwa moiragi. **17** Be yawasana barebaredima matabudi isedima inam gewagewa, be gewagewa ġesaudima damodie guri nam tima kenakenana.

**18** Tauda tè kataienā da aitau Mamaitua ġarone ya tubuġa vitarana, tauna nam gewagewa ima voivoiedina. Mamaitua inam baneginama e raberabe kauena, be Diaboro tokare nam tauna e tauconi yababe. **19** Tauda tè kataienā da tauda riukaua Mamaitua na sedama, be dobu banegidima taudi inam Diaboro na waibadae ta miamiana. **20** Be mate tè kataienā da Mamaitua Natunama ya yovo be yai katakataidana da tauna aitau riuriukauinama vutuna tà kataienā. Be tauna vutuna riuriukauinama nopone tà miamiana. Be mate tauna Natunama riuriukauinama nopone tà miamiana, inam tauna Yesu Keriso, tauna vutuna Mamaitua riuriukauinama, be yawasana kenakena nonoġinama.

**21** Yau sedama, kokoitau nam ko rauduneedi, avedi!

**Vari Verenama  
The New Testament in the Dawawa Language of  
Papua New Guinea  
Nupela Testamen long tokples Dawawa long Niugini**  
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 11 Nov 2022 from source files dated 9 Oct 2020

9b8bda32-db42-5be3-9d24-4e4a5d5f65b2